

Vorred.

Asclepiadeum etliche *Iambicum* etliche *Pentametrum* / oder *Elegiacum* vnd das *Bucolicum* / vnd andre deren ein jeder sein besonder art / solche reymen / vnd gedicht zu beschreiben gehapt hatt.

Zum andren / so haben die Alten Fürtrefflichen Menner vnd Hochgelerte *Philosophen* / ire erfahrungen in *Medicina*, *Astronomia*, *Musica* / vnd der gleichen freyen Künsten / on alle verborgenheit Freylich vnd auff das fleissigest an tag geben / vnd öffentlich (etliche in *Carmen* etliche *sages* weis) Meniglichem zu nutz vnd Gutt / beschriben / Als *Plato*, *Aristoteles*, *Auicenna*, *Pythagoras*, *Galenus*, *Plinius*, *Ptolomæus*, *Hypocrates* / vnd andre / also der massen / das von jnen das Fundament / vnd anfang solcher dingen / auff vns die nachkomen erwachsen / dor auff wir noch geartet / denen nach zu volgen / vnd vnderstond die alten in jren erfindungen / eintweders zu vberwinden / oder innen in denen dingen / do sy geirrt haben / den sel anzuzeigen. Vnd wie wol sich offter malen begibt / vnd zutregt / das jren etliche an jrem schreiben / als *Arist.* weit gefelt haben auffschneidung / *Anathomierüg* / vñ beschreibung der Menschen / vnd etlicher Tier / auch sonst in andren einfachen stucken / Itz *Galenus*, *Hypocras* / vnd andre an den *Gradibus* / vnd wirkungen der Planeten vnd Erdgeweachsen / *Plato*, *Strabo* / vnd *Ptolomæus* / an austellung der Erden / Andre am lauff / vnd gang der Planeten / vnd Gestirns / auch bewegung des Himels / vnd der kleinen zirkeln *Epiciclis* genant / Item *Diacearchus*, Am messen der Berg vnd höchenen / vnd sonst in mancherley andren dingen dorin sey der Natur zum teil / an etlichen ortten / nit kleinen gewalt geton / vnd zum Ofteren mal / aus der gwonheit ein Natur zu machen vnderstanden haben / so ist doch einmal gewis / das nichts warhafftigers den der Influss / Lauff / vnd Gang des Himels / auch nichts gewissers denn die *Geometrischen* grind mögen erfunden werden / derhalben man sy vñ semlicher kleinen felen willen in souil treffelichen beschreibungen / nit gar verachten / vnd sey von wegen des Fundaments / grunds / vnd erster erfindung / deren dingen hoch halten / vnd billich loben / vnd preisen sol.

Zum dritten / so haben jren etliche ire erfindungen *Experientzen* / vnd andre Heimlichkeiten als die *Mutationem Metallorum* item *Lapis Philosophorum* vnd ander herrliche Kunstuck beschriben / durch verkerte wort / als so ich für Feyer / Wasser / oder für Leben Todt / für Schwarz weis schreibe / vnd aber alzeit das widerspil meinte.

Die andern habens noch artiger verborgen als do ich wolt Nabal schreiben / vnd schrib Laban / für ein Weysen / ein Narren / oder hinder sich als beil schrib / vnd Leib / meinte oder *Suppinem* / schrib / vnd *Menippus* / verstendte Die dritten habē durch zaichen / vnd frembde wort geschriben als do ein wort mit einem *Character* anzeigt vñ zu versten geben wirt / als Ⓞ für *Vitriol* / Ⓢ für *Silber* / oder ⚞ für *weynesich* / oder sunst frembde wort / oder zaichen braucht / als die *Agyptier* (wie man sagt) ganze Bücher allein mit Bildern geschriben haben sollen / wie *Diodorus* anzeigt / vnd andre mer / oder mit ver-
tuncelten